

四庫全書

集部

欽定四庫全書

道園學古錄卷四十七

元 虞集 撰

記

新修開元浴室院記

袁州開元浴室院者故唐寺也宋時僧善相主院有回道人者愛其井泉甘美時來從相飲久之留墨二丸與相而去湖南轉運李甲好參訪或語之曰呂洞賓在袁

州浴室院有墨寄其主僧可徵也李道過求之相相曰
有回道人寄墨無呂洞賓也出以與李蓋黃金云明日
回至謂相曰人知我矣遂與俱去不知所終自是院無
居人荷塘山僧間來視之不能葺也獨謚嚴愿居之久
廢弟子曰法琳法琳自幼參學承事雪巖欽禪師與入
室之列孤舟濟在崇勝海印如在慧力虛谷陵在仰山
皆嘗禮之使分坐說法皇慶初元持鉢遊旁郡頗以藥
石濟人歸而傾其囊得金若干遂以葺其院建大屋曰

毗盧法界象佛菩薩天人龍神其中曰華嚴海會端其
徑遂高其門閤又有撫州判官李某鑄銅為浮屠紹興
鹽司丞周立禮買田施之而琳來京師求文以為記予
嘗聞佛者之言曰呂洞賓仙久既去後見黃龍超慧禪
師始究竟今又與俱隱去相為人不可知要是可與呂
俱亦異人矣然則夫所謂非幻不滅者果有二事哉二
人者遊戲示現將無為人之深心然而卒莫能繼之淒
涼寥落百餘年而有待於琳者何也琳遇大司空於燕

之仰山山本廬陵人其傳法遠祖曰青山辨山谷黃氏之孫本豫章人皆江西也故仰山為琳開堂集衆傳衣拂付之俾嗣其法焉由是王邸戚畹貴臣之家多知琳者名聞天子被璽書住持撫州梅山廣濟禪寺大司徒珍且爾請于帝師加其號曰佛慈普濟妙慧禪師而別出書護其院者則僉宣政院事鄂勒哲依達實之請也故為述偈以贊曰大乘浴室表清靜光明成就福德聚神王持地不動身寧隨世相有毀廢外道仙人與尊者二

俱自了去不返草深井泥古道斷百歲來者墮空寂琳
公歷事諸古佛慈愍因地不思議歸運已珍若塵沙成
此毗盧妙法界儼然宮殿彈指頃華嚴境界種種現集
雲老人破顏笑印爾願力堅定故永劫不壞常現前續
佛慧命度衆生回向當代殊勝常

相山重修保安觀記

撫州崇仁之南六十里有高厚博大之山焉曰巴山唐
名臨川山今曰相山者也循其麓三百里有餘不能周

升其巔廿餘里而後至歧而上銳自郡城南出已望見
之邑之官舍民居當陽者莫不面對雲如縷出山中盤
礴覆冒膏潤充溢衣被草木阡谷之容溝澮之通堰埭
之瀦節宣蓄泄以為稼穡之備其利無窮矣是故吏民
朝夕瞻仰一食必祝設不幸有旱溢妖沴之變土木螟
蝗之孽無小大遠邇奔告稽首得所願欲乃已巍乎高
哉穹窿欽岑之在望也其神明焉可誣哉而邑之父老
言先漢時地本南昌西南之境梅君福尉南昌有所捕

治至焉樂君已為豫章太守亦有所勅治於此二君有
仙道方術以輔其政化辟除邪暴禁止淫黷使民不逢
不若離其菑害是以德之而不忘皆有遺迹祠宇在山
之支隴唐鄧君紫陽本郡人葉君法善縉雲人亦曰南
城人皆常往來修真山中故宋時即山巔並祠此四君
者而使道士守之梅樂山下之祀祭不廢乞靈之人以
四君為歸矣紹興中郡守歷陽張公孝祥嘗刻石著其
靈應而石亡久矣其文亦僅傳開慶已未用漕臣守臣

言禱祈之應封四君為真人端平甲午加封真君皆有
褒稱咸淳辛未守臣四明黃公震端嚴有識士也至郡
連旱大究荒政斥罷淫祀獨禱於社稷山川就郡城望
拜茲山遣吏迎四君之象果得雨歲乃熟去為祥刑使
者猶屬文道其事刻石山中俾後來者知敬恭明神而
不陷昵于邪淫云內附國朝仍用道士主祠天子有詔
書祀名山大川則守令奉詔敬祠歲侵守令迎禱如故
事民間之禱祠無所禁也然山高以險祈報嘗在夏秋

時冬未寒山氣已凝為冰雪守者非清苦不能恆居四方冠褐者黃緣文書污合苟爪華之微利人迹罕至則鳥鼠散祠宇頽圯像設暴露農民顧瞻傷怛不知所出今監邑承直郎唐古巴圖大用嘗奉詔書致祭見而感焉未暇及也在官之明年為後至元庚辰四月旱種不入土禱於山麓樂君之祠其應滂沛甚異七月又旱合羣祀而禱之亟迎四君之像皆至縣治又得雨郡吏以早之迎禱四君者雨亦應而送神還山目其荒涼以懼

以愧究諸其故則主祠者無固志之弊也邑中景雲觀道士黃處和事玄教大宗師吳公於京師吳公命處和歸主華蓋之山而正一三十九代張天師已令王應真主華蓋得度弟子以居既有成績乃移處和理相山苦四至者爭利而弗卹也保童君乃為文書言諸主道教者請以處和自度弟子嗣守而葺之未數月張天師吳大宗師還書悉如巴圖之請相山先有上清法師孫慶衍受璽書領相山而留侍上方不能至處和遂次慶衍

為相山甲乙之始云巴圖告諸近山之士民曰姓某者
各出財以施黃處和耕石田飯蔬食披榛刊木躬先徒
工遂以至正辛巳歲九月克修四仙之祠道衆之舍門
廡庖庫以次而舉監邑通敏有才器治事有方畧久而
民益信服之是以作茲山也不煩勞而迨其成焉山之
人不敢昧其更始乃相與伐石而篆其事云巴圖之同
官前令奉訓大夫新知寧都州益都丁額森今令承務
郎鄆城任果前丞忠顯校尉同知寧都州縉山張榮令

丞從仕郎某郡張友諒始終共任其事者將仕佐郎主簿豫章舒文琰今尉楚國程世臣典史豫章胡天祥代胡者汴梁石成玉也至正元年歲辛巳十有一月朔旦具官虞集記

勅賜黃梅重建五祖禪師寺碑

禪宗第五代祖師諱弘忍生蘄州黃梅即黃梅為道場說法度人傳信之衣既有所付遂去縣二十里入馮茂山以居及歿弟子奉全身塔焉學人依歸聚為大利唐

人尊之曰大滿禪師塔曰法雨寺曰大中東山之寺南唐加師號曰廣化宋景德中改賜寺額真惠其初律師居之祥符八年戒禪師來住山始革為禪歷住者十二人演禪師來而東山祖庭益重宋之季年國境日蹙漸以邊障受兵州吏民奉師遺體入城求福州果以靈貺按堵不邁鋒鏑而東山見燬于兵既內附日以安輯富庶僧了行乃躬事土木崇精舍于州治之東以奉香火之留者又入東山汎掃寺之故基而致工焉塔廟庭宇

粗立而行老至元二十九年僧大通繼之成佛祖殿僧
堂方丈鐘樓之屬頗稱華麗皇慶二年三韓萬奇上人
從潘王奏請還祖東山事具義公記至治二年通又老
今住持法式方為虎溪第一坐通率衆具禮請主其山
是時寺之食者衆積弊紛拏稱貸以給式至精勵自持
大作三門黃金飾題榜作大殿奉祖師作經閣藏殿而
蒙堂安老堂行堂庫堂萬佛閣照堂庖湑垣廡次第皆
成而通公前所作多庠下不稱且以弊告又撤而更新

之務極崇勝給衆之田有鳳源永福東積復古阮家鐵
甕等莊或復或創凡二百餘頃其屋室器用之資又日
完以富鐘鼓鏗匄禪侶雲至式致用而有文又修百大
舊規而行之江漢之間隱然一大闕閫計其經始至于
落成才七年爾何其敏哉施財者自邵帥韓某總管易
某等凡若干等人其成者則大觀惠享希復也式又曰
今國家崇尚象教古昔莫能加今東山之成願力所就
蓋山川之靈實際景運而祖師名號非盛代所命不其

闕乎乃走京師將請諸朝中政院使李公信家本三韓
三韓有上人曰覺元日智承運以其事語之李公信與
其妻隴國夫人崔氏並加敬慕檀施必親又齋沐間於
中宮製金紋伽黎大衣以賜出宮中金錢萬緡與之俾
半修塔廟半為長明燈之資而式亦賜金衣受璽書號
曰佛日普照大禪師四祖信大師真身同在鄆同奉入
城又同時各歸故山故亦同有伽黎然燈之賜焉年月
日三藏法師具以奏聞天子乃賜四祖號曰妙智正覺

禪師五祖號曰妙圓普覺禪師而詔翰林直學士臣某
為文記之勒諸東山之石臣某嘗聞諸佛學之人曰釋
迦二十八傳為達磨入中國為初祖祖祖相承至忍大
師而秀與能分南北宗南宗既為六祖弟子尤盛可知
者十餘人而荷澤會南岳讓青原思最顯思之後分雲門
洞山法眼三宗會之後圭峯密推會為第七祖而於南
岳之傳頗議其任心即修為未盡然密不一二傳遂不
著於世而讓之後為為仰為臨濟數百年來衍迤盛大

多濟子孫他宗莫及也東山之為禪也實始戒戒雲門之系也實盛于演演濟之六傳嫡孫演在山時從者常千人而佛果勤佛眼遠佛鑑勤南堂靜開祖寧五祖自皆得法於此此六人者出其法益張以大而勤之後若隆若果皆振世卓然之豪傑其所警發又多大人君子而東南之言禪者大抵多其後人矣不亦盛乎嗚呼自忍師發迹茲山而成演中興之於五百年間殆法運也不然心宗無門之說不絕如綫疑似幾微之失將何所底止而折

衷哉茲寺之記所以不可不重也況式以五十年未就之規
七載畢事天將啓其人如式演者於是乎故為之銘曰

魏魏東山大士宅蒼松歷見歲七百藏真寶局面不
隔精純稟具至陽德真實不壞過金石流光燭天夕
芒白有睹其瞬朝日赫承運出見保邑國來歸有時
用無迹素華淨於冰雪色沈沈天宮萬寶積上當星
漢下連澤九江匡廬在几席鬼神與能龍獻力諸天
駿奔從帝釋豎草立刹成勿亟誰其作者行通式臣某

著銘帝所錫咨爾法界衆神伯持地主林各述職祖號具足如帝勅輔我皇元鎮無極

大興龍普明禪寺碑

天歷元年九月庚辰皇帝遣工部尚書臣士弘傳詔翰林命臣某製大興龍普明禪寺碑文皇帝若曰昔我皇考武宗皇帝撫軍朔方朕生之三年歸繼大統在位四年而棄羣臣仁廟臨御傳至英皇當是時權姦用事遭譖離間宗親近屬幾無所容海南之為地也炎霧噴毒

往鮮生還而使朕居焉閱歷歲年有安無苦朕於是覃
思以求豈非上天垂祐祖宗鴻休而致然歟乃捐金庀
工即瓊陽之勝地建釋氏之精藍以答天地祖宗之昭
貺以介福於皇帝太皇太后又以綏保其民人焉創始
于至治元年十月六日締構雄麗嶺海之間鬱為奇觀
朕雖未嘗躬落其成而想見其處常往來於懷也臨御
之始慨念疇昔因賜名曰大興龍普明禪寺其紀朕意
托諸金石俾示悠久臣某拜手稽首颺言曰昔者大舜

歷試諸難殷王高宗舊勞於外蓋雖聖賢之資猶必困
心衡慮而後膺天之大任而成帝王之能事也今陛下
躬冒瘴癘備嘗險阻則其所以下悉民情上成聖德者
夫豈一日之積哉且夫頓坐流離之餘人之常情豈暇
他顧而陛下於斯時也曾不以動其心顧方惓惓君親
之恩閔閔黎庶之苦不惜萬金建大佛事以致其誠嗚
呼君天下之量固已見於此矣不亦盛乎且臣聞之天
之所以照臨萬國者日月之明也茲於淵潛之所錫興

龍之美名俾普天之下咸仰觀其隆平之効炳煥赫奕
以至於萬億年而無窮又豈溟渤之外獨可得而私敢
述銘而刻之銘曰

於惟聖皇受命自天本固支分正緒有傳天相峻德櫛
沐風露以恬以廉貞幹之固旆旆龍旂來歸孔時臣力
師武至公何私肅肅清宮夙夜僕載而猶固讓至三至
再赫乎當陽思舊不忘曰我梵祠在彼海邦昔瞻廟朝
莫獲近只親矚下氓顛崖病只言依佛乘自我祖宗曷

既予懷於馬作宮惟天祖宗錫我景貺茲不表章闕彼
顯望乃錫嘉名如日之升文臣受詔刻石以徵咨爾島
嶠龍君海伯波瀾不驚各率厥職鏗勺鼓鐘來儀來朝
內嚮而趨天子匪遙嗟嗟遠人天子念爾念爾艱食醯
征用弛天子無為一日萬幾孰不勞心而爾是思爾有
耄老爾有婦子均感殊眷何間伊邇蔚蔚斯文金石相
宣謳歌欣愉於萬斯年

成都路正一宮碑

蜀之山川高厚而深遠故其生物也特異文武材能豪傑之士世世不乏然猶不足盡其神氣之秘縕於是有神人仙者圖赤斧之流出乎其間而世所共知者漢正一天師張陵遺跡幾徧西南事最著其興利若鹽井之屬至于今賴之其後者朱桃椎王保和等尤不可勝數最近者且百年有法師劉浩然碧雲庵道士張全者高行奇術近接耳目里中兒女子能道之故成都青陽玉局諸宮桀然以名天下者非一日矣延祐三年春予在

奉常被旨修歲祀于江瀆禮成且還思昔之所聞而問
焉凡宮室樓殿蒼乎其幽黝乎其潛萃乎魄乎其雄傑
高岸不可測者亦徒見夫深林茂木清泉瑰石而已求
其人固不得彷彿而從之也蓋為之躊躇歎息而不能
去四川儒學提舉云於此有曰汪君者幾近之修漢天
師張氏正一法持戒嚴甚飲食起居之堅苦自其徒有
不能堪蜀大旱祈禱無所應吏民走以要汪君君以其
法致之雨立至大水又以要汪君雨立止歲以不害若

夫疫癘鬼怪之撓吾民者得汪君指顧皆帖息如常時
汪君出道見者無男女老稚皆拜伏車下如見神人自
行中書省肅政廉訪司凡官府郡縣咸信尚焉未始少
為之屈也成都守實訥度地於城中之西偏與前守共
構室處之遠近之民吏軍將商賈送竹木瓦石金幣米
粟與百工操其伎自獻者四面而至矣於是宮廣若干
畝制屋為殿者二一祠天帝一祠漢正一天師為堂者
幾祠某神為圓庵及東西屋以居修真者而居汪君者

曰草堂為屋若干間門廡廚湑庫庾悉具經始以延祐
元年二月成於三年之八月總凡役者郡人徐慶原而
汪君翛然若不與知者也既復命予以汪君事語立教
嗣師立德真人吳公全節真人曰此吾龍虎山中學道
弟子也西游青城十年矣未幾成都守臣上其事集賢
院以聞有敕賜名曰正一宮正一者本其法所師之號
也汪君名集虛字太闕廣信人今守國大元帥紐掄公
之孫元帥自憲宗皇帝時以兵取蜀有大功前守張氏

名雋河中人嘗在宿衛立德真人曰子本蜀人又嘗使過其處宜為銘銘曰

維蜀之都金城靈靈靈關秦關文林漢作休養自葛殷完最唐閱世千百以安為當或伐而服或據斯取兵無久構旋按故堵壅繁蠹尾數丁剗除噓戲百年谷陵均墟既撤而息迺見芽蘖承時嘉澤更長斯洽神帝靈仁惠肯顧依宰于燥淫疵癘勿威厥惟清靜克通神志靡祈弗應相我人士人士作宮敬報神師有儼有臨匪僭

匪私於皇天子視遠如邇郡奏朝聞夕出封璽曰咨遠
人孰保孰容苟相之道予曷弗從伊祝何祕于躬受福
嗟爾衆庶視此明勅毋邪爾思勿貳爾心物辨志定正
一是欽可以安泰可以長久名不虛造是用嘉爾凡我
蜀人帝力是知永歌萬年新宮是詩

開元宮碑

皇慶二年七月使召靈妙真常崇教真人王壽衍於杭
州以弟子張嗣顯從十月至闕賜見于嘉禧殿館諸大

崇真萬壽宮真人使嗣顯來言曰某所領開元宮其因革具有始末惟不傳是懼請記之按舊志杭故有開元宮唐開元中刺史陸彥恭用詔書所作乾符戊戌燬于火後五十九年吳越文穆王復其舊其臣林鼎記之宋景德丁未勅改景德觀後十六年有以私財修之者進士陳戡記之然俱不復存嘉泰甲子寧宗以其潛邸為今宮復賜名開元並祠闕伯命大洞法師張某主之宮在祕書省之左紹定辛卯燬于火又重作之廣以大宗

正司故基賜田七十九頃度道士十四人以居大元至
元十三年行中書省杭州即故祕書省為署二十八年
大火省及宮俱燬省故隘庫不足稱大藩之容觀取開
元地擴之出金助開元主者董君德時及今真人購故
宋公主第以為宮公主宋理宗女有司護作唯恐規制
工伎甲於當時至是易其檐桷門陛榜署因加表飾設
貌位被服以象其天神帝仙人之屬隆隆然湛湛然真
神宮殊庭矣明年翰林學士承旨閻公復記之元貞二

年陳君天錫奉旨繼董君時晉王以真人藩府之舊請以主宮事真人固辭大德八年始以宣命繼陳君奉被璽書加護如故事初賜印視五品以重所領領之九年外完垣舍內嚴臺殿凡宮之為制始備又封植其花石竹樹疏導其池渠高梁跨雲曲館進風神魚靈鶴來泳來止所以休寧其修真者尤邃密靚雅樂哉天人之君乎曾城之內殆莫與加矣於是請謝宮事未幾俄賜號曰真人使者即其宮命之遂還理其宮不敢去及得見

天子即具疏言聞道家以無為為宗古之言真人者閔邈矣今為其道者善傳上意達諸神明導貺祉存著專一其事也惟太宗師大真人嗣師真人久侍中被寵遇有號名命數其貴視公卿侯伯而不與其憂責於玄教顯榮極矣夫名者實之賓泰甚則忌真人非遠臣所可得名臣敢固辭不敢稱真人得還山奉祠事以報聖朝志願誠足矣天子聞而嘉之若曰為而不有真老子之道哉昔人言仙者非有求人主人主求之耳尚慈儉尊

退讓以風示天下為國之禮則然延祐元年四月因改
賜號曰宏文輔道粹德真人命學士為訓辭示褒寵刻
銀為印視二品使畫護杭州諸宮觀仍治開元宮亦名
璽顯以璽書而別為璽書給驛騎五命徧祠江南諸名
山奉辭之日天子見之便殿賜坐留與語移時深稱上
旨因顧侍臣曰予早知大宗師今年高德彌謹嗣而傳
之者予必貴之此其人尤宏廓用謙以為禮者乃字真
人而命之曰眉叟朕知老子所為道德經開物成務者

也善學者人人可用世非獨道家書先命近臣以明示
中外爾尚敬宣至意勿敢忘又賜寶冠金衣始稱真人
服章焉於乎開元之為宮久矣繇真人深自謙抑為上
所嘉顯其名蓋遂表著于天下宜有銘銘曰

於皇聖世治繇清靜惠宗道家受釐有祠內外相望靡
不寵嘉煌煌我宮殿于東南神明之居在昔前王化家
作之中其國都何因何稽曰為開元厥維禎符禎符孔
明大開元疆神告不誣顧民弗省歲行六十既燬而墟

除而圖新爰得永宜天人合謀甲觀夙成帝子攸降巍
巍渠渠道貴因循不貴改作昔劬我舒迺象貴神赫如
有臨風馭電車大集于成在今真人克恭璽書恩言雅
文真人用謙為道光華自朝旋宮率職贊祠思用不渝
錫福予齡天子不有于民是敷維千萬年至於億世邈
哉永圖敢述聖德刻以貞石式章道樞

玉笥山清真宮碑

玉笥山清真宮在臨江之新淦其實錄以為本名羣玉

山漢武帝授上清籙於此見有光如笥下之改今名而以
上清名宮云元封五年武帝行巡南郡登潛天柱山出
尋陽浮江過彭蠡所過祠名山大川今山在彭蠡上游
數百里豈嘗至而史畧之不然則郡國望幸者或繕其
治處矣按圖其山起東南稍行而南為三峯名赤松
漢武魏夫人三壇又西為覆箱峯特奇峻又北為北峯中
引小墮而下宮在窈窕中與前三峯相直上有石壇九
避秦人孔丘明等九人上昇處故曰送仙峯又東為郁

木坑其東南出與初起山相值兩山之趾犬牙交人緣
澗水取徑二十四曲折始出山外而中若環堵者矣意
者受寬而括約筭之所以得名者與其所祠神君曰九
天司命左曰洞天天王右曰洞天仙官蓋古之得道者
云又曰繇其三峰之崇高嚴厲故以名此近是矣其地
多奇卉靈藥又有丹井墨池壇洞之屬皆托古仙神人
以名之信乎非世俗所得有者每天高氣清有聲出空
中如衆樂並作莫知其名物然一時同在者或聞或不

聞及夜閒寂又如聞車馬金革之來若神物有所劾治者居民相傳畏忌遠其家數十里外獨學道之徒居是宮耳宮之始末可知者梁天監中杜曇永與其門人錢文詠來居蕭子雲以錢百萬助成之宮今有石刻在宮中云是曇永所撰上清宮碑文而文詠書然其署官文字制作不合疑後人所重立有改易失真者唐長慶中謝修通奉母隱此山實錄所著也南唐時皮羽南受知後主刻木為印使佩之以治宮事徐公錯為篆上清宮

額此最可傳信者矣宋宣和中勅改為清真宮端平丙申主宮事者李希白故給事中大有之孫也郡人重之為請于朝使度弟子得甲乙相次傳授乃得涂紹禹魯道隆皆名家子又有道行法術為時所尊敬故能大其宮而新之益入田租以給衆來者日至而宋亡矣自是以來相繼治其宮者曰胡永年曾卿魯劉繼賢曾季謙張高老涂宏道其方來則歐陽本一聶立仁其人也至元丙戌世祖皇帝嘗召卿胄至京師咨問稱旨留之四

年乃得還既而宮之屋日敝於是元貞丙申永年作法
堂至大戊申鄉胄嵩老又作沖妙堂戊午季謙又作三
清殿先後以其財來助者郡人胡復張日新臨川夏廬
陵曾德和曾巽申曾如圭姑蘇周靜法也其後繼作日
虔不懈而宮皆新成者矣三清殿成之明年聶立仁方從
玄教嗣宗師以其事來告曰未有年而吾宮新則昔之
從事於此者多矣然自杜君以來姓名可考者寥寥數
人耳則其泯而無聞者無文字金石之托也不可自我

之世無以示後人子幸為我銘予既聞而歎曰山川之
形勢為豪傑所臨依衆庶所會通者歷歷可見然而忽
然之間時往物異則感慨係之而荒閒寂寞之濱乃有
斯人據泉石之極致以相傳長久如此乃為次第其說
而勒之以銘銘曰

太秀之山羣玉之府廓兮有容若筭將貯不鍵而固匪
橐而盈合冲納和伸憑虛生其神孔明維大司命參我
左右宰我衆正若瞻紫垣羅絡四周表衛中居旋制九

州文昌之宮泰階之上靈氣翕張孰孰其象偉若降精
歸崑崙峙停燭燎弗輕食于殊庭神君欲來冷風與俱樂
出太空合神于無朝陽熙熙夕顯肅肅孰其迎將孰其
往復精明粹融潛滋密充自然遂成闕不逢穆穆在
朝皞皞在野我宮恒新以詔來者

道園學古錄卷四十七

欽定四庫全書

道園學古錄卷四十八

元 虞集 撰

碑

崇壽觀碑

大茅山之下當華陽南洞之便門有崇壽觀者本晉洞
天觀館主任敦故宅宋元嘉十一年路太后始建壇宇
大始中廬陵太守孔嗣之重立以奉曲阿高士華文賢

齊建元二年勅句容王文清仍立而主之名崇元館武帝以太子時至焉唐貞觀初勅改為崇元觀有太極元年所樹碑石完而文泯可識者左拾遺孫處玄文揚幽經書數字而已天寶七年李玄靜先生奉勅重修復民百家備修葺寶曆三年主者有賀思寶則因器物銘識而考見者也宋大中祥符七年勅賜今名大元至治二年句曲外史張君嗣真始來主之顧瞻方臺近對南面左峯疊玉右引大茅之支而回合焉定錄君噉言大茅

山下有泉水近水口處可立靜舍陶隱居云近南大洞
口有好流水而多石出便平比有王文清居之則此觀
是矣乃嘆曰山中館宇自齊梁唐宋至于今代有增益
求諸晉人之舊惟此與王晨許長史宅耳而吾所治乃
傾廢隘陋特甚豈不在我耶於是度材鳩工更後堂為
大元殿以復舊規象三茅君於中東為任華王李賀五
君祠西為陶隱居祠充前殿基為弘道壇自製銘其上
壇東為玄武祠西為廣惠祠後為文賢講堂而前為都

門門外浚古玉津池盡受大茅南面諸原之水循池西南得昭明太子讀書臺臺東有井曰福鄉井福鄉者因昭明道館名也出諸榛莽著文刻石覆之以亭而巖洞泉石之勝近在百步內者皆按圖表之可以觀覽泰定元年上清四十五代宗師劉君大彬朝京師授子始末乃為之次第焉張君吳郡人名天雨內名嗣真字伯雨別號貞居年二十棄家入道徧游天台括蒼諸名山吳人周大靜先為許宗師弟子得揚許遺書張君從而以

為師悉受其說嘗從開元王君壽衍入朝被璽書賜驛
傳顯受教門擢任非其志也即自誓不希榮進因從三
茅之招追奉任君而下五君為文而告之願畢力茲宇
所著外史山世集三卷碧巖玄會錄二卷又尋山志十
五卷考索極精博云烏乎自任君始居此餘數百年才
五人傳焉其自致于久遠者果何托也豈若後世各誘
門人系以私屬如家人父子者哉故寧希闊而有待今
張君無前代賜予之助徒草衣木食以營此而曠然思

與四方之士共為千載之期豈非落落丈夫也哉予故與君為方外友奇其能先予遠舉也故系之以詩曰

大茅南垂元氣積陰開闔扉陽洞闢曲穴流泉保靈宅
任君來餌黃赤石天一召錫太元冊曲阿受養良有擇
構官方嚴自王伯清蹕臨止靈響格虛林森爽化赫奕
福鄉帝子發甘液不食何年喪遺覽白雲闕開

元全盛煩百役持節旁午致纁璧爾來蕭條出代隔闕

文土漫畫誰其啓之規古昔句曲外史美冠舄研書

千卷視貞白天真景隨玄系繹玉室金堂萬無數

仙都山新作玉虛宮碑

縉雲縣仙都山者道家書以為祈仙總真洞天相傳黃
帝曾於此煉丹而仙去唐天寶中賜號仙都山祠黃帝
禁樵獵三百里李陽冰所為題黃帝祠宇者也宋治平
三年賜名玉虛宮天禧中連年勅修醮宣和三年燬于
寇道士游大成作之開慶中郡守安劉相陰陽更定面
勢命道士陳觀定改作之內附國朝主宮事者四方之

人皆得為之而宮日廢道士趙嗣祺世居縉雲受業
茲山去而學仙武夷山數年後入京師朝中貴人喜之
延祐元年欽奉聖旨主領宮事始重新之三年刻銅印
授之視五品五年受宣命住持兼領本路諸宮觀嗣漢
三十九代天師及玄教大宗師請以宮中師弟子甲乙
相次主其宮事聞有旨從之泰定二年也嗣祺遂承詔
徧祀東南名山歸主建康玄妙觀得謁今上皇帝于潛
邸至順二年來見因求歸仙都不獲請有旨更賜號曰

教門真士玄明通道虛一先生乃來告曰仙都宮成未
有記今既未克歸懼因循無以示久遠幸勒文表之乃
為著銘曰

縉雲之虛有峻其高旁無引緣上干雲霄軒后神明去
世遂遼祠宇在焉沖融消搖微音出空豈其下邈有宮
有廬有壇有時大光昭宣百靈萃止疵癘不作錫我繁
祉室有壽考孫曾婦子不知不識明梁甘醴維昔軒后
廣成是師千二百歲而身不衰究觀緒言澹乎無為以

修其身民用雍熙請以告民萬年如斯

勅封顯祐廟碑

至順二年夏江西行省以文書白于朝曰吉安守臣言其所統吉水州中鵠鄉有神廟食于石礮之里者相傳神姓劉氏諱煥蓋長沙定王之裔云舊志以為隋時始有廟至唐而益大歷五代及宋靈異甚著建炎初金兵蹂江南隆祐太后入贛避之舟行為石所礙有巨人翼其舟以出于險后物色之則神良是也遣人祠謝之自

是百數十年之間歲或旱禱之則必有雲起其東以為
雨有蝗禱之蝗不至其旁近有羣盜犯其境禱之賊恍
惚有所見而散去當是時州固縣也而郡守之禱之也
必具官位姓名謹書祝辭于版而致敬焉勅賜其廟曰
孚應廟又封其神曰順惠侯蓋當時之制神靈之有功
於民者有司覈實其事以聞始賜廟額又有功則封之
以王其號自二字以上累封至八字極矣自入國朝來
凡水旱疾疫盜賊無有禱而弗應者而神封備仍前代

之舊非闕歟聖朝懷柔百神德意至渥詔書每下則有司長吏必謹具牲幣奉祠境內諸神之在祀典者是以石礮之祭歲月相望也請更大其封以答神庥而以慰民人敢以為告於是中書下其事禮部禮部移書太常而博士議曰宜因其舊而更其廟號曰顯佑廟加封神曰昭烈王吉水州道士某法師提點某觀事劉學仙來請書其事而刻諸石且曰為神求封者州民李從大也奉成命以歸報神者李思用某也新王之廟而大之者

某某也學仙嘗游西北諸邊為宗室諸侯王客多見神異之事至京師達方言於好事者甚多有之若至亦集乃路塞占山北見有烹羔桐酪祠龍湫數皮而沈之祝曰神為我鞬而治之為期日而去至期復祠之則得成革矣若有鬼工然不可測也其地往往有人在京師者或從質學仙言則信蓋其人習以為常而又不能言諸人耳志怪若此者猶因學仙之言而傳況石磬之事書而識之何靳焉學仙好文學能為歌詩故又為享神之

辭曰

坎坎伐鼓石礮之下注醪盈觴解牲在俎神其來思胥
樂于舞我東日瞻雲來如雨誰其從之昆弟如侶神固
王孫長沙伊祖惠我孔仁亦厲而武是耶非耶來即于
所神之享我自我祖父昔侯今王天子之祐裳衣有章
丹楹朱戶肅肅孔容孰敢予侮驅我癘鬼去我蝨賊豐
我大田寧我屋宇爾受我依至于終古

銘

佛國普安大禪師塔銘

至順二年夏上都大龍光華嚴禪寺住持僧法琳言昔
在憲宗皇帝癸丑之歲世祖皇帝嘗命我開山溫公統
釋氏于中原後五年丙辰之歲始城上都又三年戊午
之歲作大龍光華嚴寺于城東北隅溫公主之溫去
世而少林雪庭裕公主之裕公去之二十年竹齋誼公
屏巖顯公雲松微公至於我先師筠軒壽公六世矣在
壽公之時英宗皇帝念茲寺為世祖所築作而新之加

廣大馬命壽公為司徒以重其事壽公以為溫公肯事
世祖豪卓瑰異有足稱者宜表見于茲未及有所為而
歿蓋自溫公至于今八十年歲月滋久恐遂湮沒誠願
伐石紀事以成先司徒之志而不敢自專也乃七月二
十日上在上都清暑于洪禧殿之便坐侍臣有羣王內
司亞尉阿爾斯蘭布哈以琳之言聞且以臣某侍書奎
章間下在從官中請使屬又以賜之勅曰可明日阿爾
斯蘭布哈傳勅至臣所臣從琳得溫公事狀云師諱至

溫字其玉一號全一邢州郝氏子也幼聰敏異常兒年
六歲其母攜之至龐馬村見寂照和尚於淨土院寂照
曰汝其為釋氏乎師心許之會寂照避亂去隱遼西乃
禮寂照弟子辨庵訥而祝髮焉無還富公主淨土菴衆
甚嚴師不以為忤庚寅之歲無還開法萬壽師與十僧
同往佐之萬松某公以青州辨公宗旨開示法要門庭
高廣四方尊之師見萬松始以才氣過人稍不容于衆
然而傳記多聞論辨無礙百家諸子之言多所涉獵又

善草書有顛素之遺法年才十有五為萬松侍者凡萬松偈頌法語一聞輒了之遂得法焉常以侍者代應對談鋒迅利不可犯時人已深期之故太保劉文貞公長師一歲少時相好也劉公厭世故思學道師歡之為僧同參西京寶勝明公既而為世祖知遇侍帷幄為謀臣薦師可大用得召見與語大悅將授以官弗受曰天下佛法流通臣僧之願富貴非所望也留王庭多有贊益居三歲遣還出賜金資日用不計其費時憲宗命海雲

主釋教詔天下作資戒會師持旨宣布中外而輔成之
世祖征雲南還劉公請承制錫師號曰佛國普安大禪
師總攝關西五路河南南京等路太原府路邢洛磁懷
孟等州僧尼之事刻印以賜師銳意衛教凡僧之田廬
見侵于豪富及他教者皆力歸之馳駟四出周於所履
必獲其志乃已自其門人或勸之少憩弗懈也五臺山
清涼勝會凡百晝夜既得請興廢于兵火數十年之後
師假貸以經始既而四方雲集嚮應金穀之施與瓜果

之供養反有過承平之時而山之真容等院因以完實而新美若此者特其材畧之緒餘也師既開山龍光又作大都之資聖真定之安國汾陽之開化彰德之光天固安之興化三河之蓮宮餘不能盡紀憲宗末年僧道士有諍各為違言以相危上命聚訟於和林剖決真偽師從少林諸師辨之道士義墮羅須髮者十七人道宮之復為僧者以千百計中統建元釋教大盛僧衆賴之甚思師之功焉而師遂納印辭職每歲官賜金修寺之

外世味泊如也至元丁卯五月二十二日以疾終于桓
州之天宮寺西向右脇而化當暑儀形如生更有異香
三日火浴之心舌才不壞衆庶指其地深數尺猶得舍
利云壽五十一僧臘四十師有草書詩文傳于世可以
觀其人焉其老也將有所論撰不及而歿臣聞世祖皇
帝聖度如天善馭豪傑自在潛邸至于混一海內天下
之人材小大畢至以足其任使故其功業之盛巍巍然
赫赫然三代而下帝王未有或之及也浮圖氏以寂滅

為宗而才器文辨如溫公者亦豈常人之流哉敢叙而表之以見夫興王之運其人如此銘曰

維昔世皇始理開平作其潛藩有宮有城顧瞻東隅泉甘土厚蜿蜒來止屬垣負阜命建仁祠龍光是名權輿來尸僧有豪英氣如虹霓辨若風雨縱橫凌厲莫敢侮侮世皇有為羣策是稽召見從容出其端倪善其利器俾反初服報德不回屹若孤鵠林林釋徒稟教以居孰為紛更八主出奴天子有命存完去馭我馳我驅立折

其角燕趙之間至于陝關我田我廬來歸匪艱世皇御
極民用寧一而釋之門既振既息時龍光師燕居弗馳
散其緒餘為書為詩詩揚宗風書縱逸趣沛將有述棄
而遽去維時名僧至於公卿有誄有辭失之若驚垂八
十年英標如在誰知表之嗣者七代義舉有聞天子喜
之史臣屬辭以係遐思

智覺禪師塔銘

天目之山有獅子巖高峯妙禪師居之設死闕以辨決

參學之士望崖而退者或衆矣得一人曰本公是為中
峯和尚師生有異徵為童兒嬉戲必為佛事暨入鄉校
尋棄去稍長閱經教然指臂求佛甚切晝夜彌厲困則
首觸柱以自儆期必得乃已及入死關密受心要久之
誦金剛經至荷擔如來阿耨多羅三藐三菩提處恍然
開悟自是說法示人縱橫該貫如千江一源奔注放溢
莫之能禦從容自在若不經思累千百言應問無礙隨
其根器廣為策勵推以為大辨焉緇素及門自以為有

得卽所聞受傳錄模印行於四方所謂法語書疏題唱
之屬不可勝計又有書五篇曰破胎息論妄傳曰闢信
心明義解曰擬寒山詩曰辨七徵心處曰說如幻法名
曰一花五葉集虛谷凌禪師於師為尊屬見而嘆曰此
佛祖向上事非下根小器所可識也仁宗皇帝聞而聘之
不至製金襴袈裟賜之曰佛慈圓照廣慧禪師賜獅子院
名曰正覺禪寺英宗皇帝亦封香製衣卽所居而修敬
焉駙馬太尉瀋王王璋使人從師問法意以為未足請

於上親往見之既見構亭巖前曰真際表得法也三藏
法師沙津愛護持必納雅實理遊方時常從師參詰及
事三朝每為上道之翰林承旨吳興趙公孟頫每受師
書必焚香望拜與師書必稱弟子行省丞相拜布哈行
宣政院使張閭諸達官尤加敬愛每徑山虛席必以待
師師固不受乃已轉運使瞿霆發作大覺寺以奉師亦
不受師踰浙絕江渡淮溯汴至浮舟以居而避去之從
之者如雲北極龍漠東涉三韓西域南詔之人遠出萬

里之外莫不至焉所至結庵一名幻住信施金幣重寶
交至一視之邈如也師相好魁碩見者稱嘆皆畫象事
之南詔人有奉其象者夜有神光燭天其士感悅遂篤
信禪宗云時人為之語曰師乘大悲願力為法檀度觀
時識宜隨機應物多諸方便如摩尼珠無有定色為未
證得謂證得者我說無悟由為求名聞利養者韜晦巖
谷為毀犯律儀者演毗尼法為妄認法塵以資狂解者
導以正悟為圓機者直示向上師皆以身先之不事夫

空言也而師方自以為文字失於學問參究關於悟明尋常好事者所稱蓋報緣之偶然爾翩然為退休之計蓋師之高邁過人遠甚而謙抑如此所以為不可及也師諱明本宋景定癸亥歲生錢塘之新城姓孫氏年六十一僧臘三十七大元至治癸亥八月十五日化於其山東岡之草庵有訣別書偈誡門人勿行世俗禮而門人及遠近來弔者哭師甚哀聲動山谷遂奉全身葬以西岡之上而塔焉後七年為天歷二年正月甲子天子

使翰林學士承旨領國子監事額琳特穆爾召臣集至
便殿命之若曰其賜師號與塔名而汝為之銘俾其門
人單檀密即禮刻之山中臣某再拜而言曰國家崇尚
佛乘至矣而禪宗惟東南為盛然專席稱師者豈無其
人哉至于四十餘年之間浩然說法其言語文字汪洋
廣博為遠近信向未有若師之盛者也請製智覺禪師
法雲塔之銘曰

巍巍楞伽上極無際大雄善喻著無上義達摩之東憂

言多窮獨此不遺曰心之宗是故妙師高蹈天目右海
左江以表遐矚師子巖巖置死為闕孰當吾鋒有造無
還惟幻住叟登中據最示則絕學無倚無外千偈瀾翻
夫豈好言昏蒙銅深挾提孔難如彼淫疾勝邪並受有
大醫王為出一手砭熇塗摩搗嚼鍊烹紛然百為因病
以生疾除醫已言亦如是得本不迷何有一字悲願深
弘智覺所敦受職度人鬱手法雲法雲彌天有蔭斯普
協于皇風永填終古

大辨禪師寶華塔銘

達摩傳佛心法于中夏臨濟一宗最為得人七傳為楊
岐白雲五祖闡悟真所謂不立一法根源直截者灼有
端緒不可誣也悟之傳有虎丘隆大慧果卓然植其宗
風於故宋南渡之初門戶巖峻波瀾浩湯自朝廷大臣
縉紳先生莫不委心焉道不同者猶徘徊稱嘆以為不
可及東南禪門之盛未有及于斯者而隆之傳應庵華
密庵傑破庵先無範演化之宏與慧相望至于雪巖欽

公五世矣當宗之亡宗門尊宿漸向寂寞巖公毅然自任其導引甚方便而鑑可極巖絕得法于其門者十數人徧布江湖之間各以所至坐大道場宣闡法要在大江之西者則虛谷陵海印如父子兄弟相為倡和以發明斯事諸方尊信之嗣巖集雲之席者則吾陵公禪師而已師年十九落髮於東陽資壽院受具戒即謁虛舟遠于雙林又依東叟穎於淨慈掌內記石林輩至淨慈師亦侍者兼外記徑山雲峯高尤敬之諸分座說法凜

凜諸老之餘風得師相與議論激昂發明咸器重之爭以得師為重而師曾不以此自足乃見巖公于抗遇諸塗巖舉黃龍見慈明事問之巖印其頴達及歸大仰而師方遊金山遣書招之甫至遽請為第一座一日室中巖舉臨濟在黃蘗三度喫六十拄杖因忍向大愚肋下築拳師云鈍置殺人巖便打師拂袖出至元丙戌歲也是冬巖將示滅拍師肩曰吾以此擔累汝師曰終不向者裏活埋却未幾巖果化去衆以為佛祖向上一機微

師莫能開示力請師繼其席師勉循焉垂三語以驗來學曰三乘十二分教拈向一邊蝦蟇口裏道將一句來曰狗子聞柱聲因甚咬破庫堂前露柱曰獼徑橋吞却集雲峯是第幾機答者罕契其意一坐三十夏四方學者奔湊規範森嚴有誘掖而無假借裨販之流或欲得一言以自表深謙重施以求之卒不可得師為文章清麗高古曩絕塵俗西江之老於文學者往往故國之遺傲睨一世及見師嗒然自失者多矣而少俊之才由師

指示而英英脫穎於翰墨之場者亦間有之然則況于
為其學者乎寺嘗有水火寇攘之厄師隨葺隨更若不
經意施者雲集既敏于成又加廣大有非人力所能者
歲饑師每食必與衆僧共之方丈之外無私炷爨嘗與
客語過齋時及夜饑不自勝侍者請取勺粟鬻水以為
飲師不可曰常住物非住持人所得私其清苦如此或
出山至城府官民緇白迎拜道左親慕愛敬始終如一
無或間然杭之徑山江左望刹之最公論願師一至其

處久矣延祐丙辰行省稟朝旨迎師居之袁人士號慕
遮挽或訴有司留之不可扁舟所經望塵瞻禮以祈法
施及至徑山開堂之日萬口翕然以為不媿妙喜于二
百年之外者百廢具舉四衆歸心嘗與隣峯受供長者
之家食器列皆白金也施者奉齋竟請從者并几器叔
之師目從者只取餘齋而已及與隣峯聯舟還從者微
哂曰師誤隣峯虛行矣問故從者浙人長者重施以為
常師不受他師亦不取師嘆曰汝奉佛遺教固為是見


解耶此與瓦礫何殊而生計度心貴人達官舉家奉施
拜禮師不為動亦不加傲識者稱之蓋住山七年而歿
世祖皇帝時嘗召見說法稱旨賜號佛鑑禪師大德中
新作大仰山太平興國禪寺事聞成宗皇帝嘉之勅翰
林學士承旨程鉅夫製文勒石加賜大圓之號其來徑
山也仁宗皇帝又加號曰慧照至治壬戌四月十二日
手書囑付時官外護宗教戒敕弟子說偈示寂于不動
軒其徒奉全身瘞諸西峯昌浦田師諱希陵字西白姓

何氏婺之義烏人也世壽七十六僧臘五十七有瀑巖集及語錄偈頌凡若干卷行于世昌浦田者故給事中郎公簡歸隱故處而其塔癡絕冲照堂一荆叟珏之次初師在衆中有兩蛇常于檻外朝之仰山古有二龍龍至今靈異或曰二蛇即龍云無準塔前有巖桂樹常以歲三月準示涅槃日開數花及師主山之歲花乃盈樹師平生主二大山幾四十年其因緣豈偶然哉泰定四年徑山首座子良徒步乞食來京師求塔銘于某久未

克為也良堅忍寒苦者數年不解天厯二年四月二十
一日翰林學士承旨光祿大夫額琳特穆爾奎章閣大
學士光祿大夫和塔拉爾默色奎章閣學士參書文林
郎柯九思侍便殿具言師之道行良之志與文之所以
未克者有旨賜號曰大辨禪師塔曰寶華之塔而命臣
集為文臣集頓首稽首而著銘曰

先佛既遠後佛未逢如是中間妙義非空璫璫巖瀑春
雨時至珠璣散落無有量計天上人間海藏龍宮各得

少分不昧心宗而大辨師宴坐一室翠藤彌天竹樹綿
密古雪在山夔絕人蹤畧示三闕一綫之通我觀華嚴
儒童本智帝網交參珠光無二大雄之宮列城潭潭雷
音不興羣蒙共酣集雲之峰雙徑之塢樹大法幢鳴大
法鼓神龍來聽天雨寶華諸天唱言辨才不夸聖皇御
世尊敬法寶千劫信願億載之保應期而生師在江南
四聖具瞻如見優曇巍巍靈山儼然高會其來非來其
去非逝無垢者月大慈者雲覆照無窮贊以彌文



道園學古錄卷四十八

欽定四庫全書

集部

道園學古錄卷

四十九
五十

詳校官庶吉士_臣李如筠

侍讀_臣孫球履勘

總校官進士_臣朱鈐

校對官編修_臣蔡廷衡

謄錄監生_臣張曾詒

欽定四庫全書

道園學古錄卷四十九

元 虞集 撰

銘

晦機禪師塔銘

古之所謂豪傑之士者必曠世而一遇其不恒見於天下者何也蓋嘗聞之豈無其人哉自夫世務之沉冥俗學之纏糾有不足以繫而留之者於是脫然自拔於浮

沈起滅之表以求其本初之極至者焉則漠然無所爲乎斯世者矣其卒爲浮屠氏之歸者皆其人也予嘗誦其言而悲之然嘗上下千百年間而求之殆果然不誣也大江之南有佛智晦機禪師者諱某姓唐氏世爲豫章儒家其族父曰明公者學佛西山明覺院而能聚族人子弟教之師與兄子元齡俱從學進士業元齡既登進士第而歸遂從明公落髮游方時年十九耳其母憐之私具白金爲裝具明公曰是足喪子之志師即盡以

歸母不持一錢以行至吳一時名師皆欲出已坐下不顧也聞物初觀禪師住玉几往依之十年無知者偶與書記清默語大驚異之以告初初召詰之信然畱侍左右朝夕諮問盡發其祕字之曰晦機爲偈以囑焉後至錢塘寧退耕衍石凡在南北山虛記室以待不應久之勉從穎東叟之請當時貴人多致師出世者皆不答一衲二十年泊如也至元中楊璉真伽總統釋教江淮有旨取育王塔中舍利進入乃親詣師求記述始末因與俱

朝京師師曰我有老母兵後存亡不可知歸江西尋之則元齡固以臨江通判從文丞相起兵死獨母在耳奉之以孝聞種竹卓庵於鄉曰竹所與簡竹屋申如翁居往復酬唱發揚宗旨四方來學者數百人至無所容又居瀟山凡六年而棄之洪之人請師住天寧師以讓簡簡歿洪人來請師又以讓秀祖巖江西總統乃請師住黃龍亦不住元貞二年始應百丈之請居十三年而百丈赫然爲天下禪宗第一至大元年應淨慈之請至之

日行中書省行宣政院之長各率其屬拜伏迎請中國
學者及高麗雲南日本之僧前願致師而不得者皆爭
見門下以千百數居十年乃作大佛閣市民僦居旁近
相撓雜者撤而遷之端門廣術夾植松柏皆前人以爲
難者指顧成之有餘也於是中書省平章政事張閭與
行省丞相下令告羣寺曰其各以僧集冷泉亭下惟老
病守舍者勿至衆大驚不知所爲是日集者幾萬人以
次立聽曰徑山者當卜某若某衆曰諾丞相親探得師

名以示衆衆曰諾無異言即親送師入山不容辭至親
爲券假食以供衆居三月師扶杖歸南山之下復起之
不往也江西學者咸思慕師願得住大仰而依歸之師
頗聞竟乘扁舟逃去或告曰師老矣百丈故鄉也盍此
歸乎師信之返至杭大仰人哀懇得師歸乃已居三年
將示寂手書謝所與往來作偈示衆擲筆化去某年月
日也壽八十二度弟子數百參學者數千人大仰之下
有金鷄石者名應馬大師玄識故奉瘞焉而弟子之在

杭者又建塔於淨慈之西隱公所嘗居也至治二年夏
集過浙江遇師之大弟子某於報國寺同禮師山中從
諸門人知師遺事如因請爲之銘云集嘗觀師於文字
蓋積思博學非俗儒小生所能至其大辨明慧洞徹心
要誠一代之宗匠四住名山皆迫而後應進退裕如師
庵居從之者過於大刹及其門者多特達卓異此非所
謂豪傑者乎彼持不足之資區區自矜求試致敗取訾
而不恥者視師爲何如哉銘曰

於皇聖元崇佛尚祖旁求碩師密贊神宇跨浙歷江梵
宇于于師三十年四專其居或尚力致我有弗有或競
于暨我紓而久鼓鍾振揚人天畢來龍象言言孰是可
欺師住世時言滿天下濕慈暢宣心泯物化來參來歸
千百與俱各極精明不畱固愚今去而亡俯仰無極何
以識之南山之石金鷄惜惜慧日赫然有覺爾冥孰敢
弗欽

廣鑄禪師塔銘

荆門當陽王泉景德禪寺者智者大師道場也智者荆
州人自天台還止此山相傳有神自稱漢前將軍關某
歿而藏神於此願佐師遂建伽藍焉自隋歷唐至宋主
之者皆名世之士元豐中蜀僧承皓來主之道行孤峻
張公商英爲著法堂記及歿又著塔銘其文具在其後
大慧三弟相繼主之赫然荆楚間他刹莫之及也宋季
郡當兵衝不能有所安輯及內附國朝荆爲樂土有惠
珍師經理茲寺粗能創始而化去至大二年珍之弟子

廣鑄應請以來大有建立凡廿二年而殁藏舍利于縣之青陽坪其弟子福祐自其寺如京師介奎章閣學士典籤烏克章請用皓公故事來求塔銘其言曰我佛氏家應機致用隨時顯蹟非一端也或嚴戒律以制心或專禪定以啓悟或妙莊嚴以生信或廣經典以明教一期方便等無差別先師一座道場垂及兩紀風雨不動安如須彌爲法爲人熾盛圓滿自非夙有記受其福德詎能爾耶張君予鄉人固非予所敢望而克莊予僚友

也儒業之外深明內典故重其言而述焉師諱廣姓黃氏父某母伏蒙城人至元丁丑歲伏夫人夢大香象背負圓光而至寤即生師稍長不與羣兒嬉戲每聞佛經順口依之即能成誦行履端嚴如素守律年十三辭親入玉泉禮藏山珍禪師受具落髮蓋松源岳禪師之弟五傳也年十五游方未遠聞珍歿而還師嘗夢見三佛相好殊勝光明希有其中尊舒金色臂摩其頂呼之爲掬多者九傍有聖僧謂師曰世尊命爾爲掬多何不禮

拜師遂具禮恍然而悟一時儼然在前心源清涼三歎
奇事指授繪者寫其所觀至今存焉珍之治景德也僅
能起廢有瑄者弗克嗣其業日加廢敗寺衆迎師歸繼
珍席魯未踰時百爲具舉至大二年入見武宗皇帝出
璽書護其寺賜香俾誦大藏經滿散之日師升座說法
天雨寶華繽紛滿空不至地者才及丈許萬目驚異嘆
未曾有皇慶元年入見仁宗皇帝上知師無雜食以馬
湏爲賜泰定四年賜號曰佛光慧日普照永福大師帝

師親爲授記名之曰僧嘉幹節爾授以伽黎衣仍歸主
其山凡珍之未備者既皆成之別建毘盧高十丈以貯
藏經像華嚴五十三叅於壁下嚴兩金剛高四丈五尺
又建萬佛閣高十丈上奉佛像萬軀下爲法堂又作鍾
樓皆高十丈其像設嚴悉以黃金僧堂行堂兩方丈旃
檀林庖庫之屬其高廣大抵與諸閣相稱又別建關將
軍廟龍王祠於寺側尤極宏麗又以伏夫人故宅爲永
福報隆寺在當陽縣中吏民祈禱以爲首刹凡有營建

不憚寒暑皆身先之建閣時材木之鉅且脩者水運多
灣洄莫能致一夕水忽大漲盡至近地餘筏溯溪挽者
徧履田畔不絕田主欲因夜斷引綆至則見若於菟守
之迺悔愧以懼更爲推致云環寺種松杉數萬株增廣
寺田以贍衆先奪於豪家者復之可購者購之設有水
旱蟲蝗之菑師默禱輒應環寺百數十里間未嘗有凶
歲刻華嚴法華楞嚴圓覺楞伽金剛般若諸經論模印
流通前後所施凡數萬部度經之餘地又廣購儒書道

書以實之修水陸大醮一百餘會日誦華嚴經兩函禮
觀音千拜領衆說法清規嚴整夙興夜坐至老不變談
辨文慧江湖尚之至順二年四月二十四日師集衆叙
別衆舉座元至吉嗣寺事師肯之遂跣趺而逝空中如
聞有妙樂之音白雲覆地山谷悲慘南土早炎驟變寒
慄入龕逾夕顏貌如生闍維之餘收舍利無數惟舌根
牙齒數珠不壞世壽五十五僧臘四十二有詩偈語錄
若干卷門人傳焉昔智者大師立精藍三十六所玉泉

其一也千百年中或存或廢或顯或微歸然鼎盛於聖
元治平之世若茲山者豈偶然哉今叢林學者知死生
之大究竟已事豈乏其人而依止啓發則存乎得所宗
者尚多智者大師在時楞嚴未至震旦嘗西望跼蹐而
願見焉今師首刻是經庶幾智者之遺意矣銘曰

我聞掬多於法大護籌盈石室不可量數應緣出世宿
因現前九呼其名佛口親宣弘教一方起於早歲樹大
法幢江漢之埃前哲寥寥鼓魚絕音師始爲之願力如

心宮殿樓閣金瑰珠璧纓絡幡蓋充滿嚴飭田池園林
材用所生來獻來歸不煩度營百萬億佛諸菩薩衆聖
僧法寶攝受妙供大威力神忠勇之資迺暨龍君並安
厥祠既安既成廣大堅固師於是時鳴大法鼓四衆安
然肅恭軌儀晨香夕燈師率先之二十二年常如一日
天華散隊以贊皇錫大乘諸經沛然四馳凡有見聞自
決其疑大圓寶光初現妙相俄歸大寥仍以象往千山
之陰萬杉之林付託有傳龍天具欽

斷崖和尚塔銘

昔西方聖人爲一大事出見於世法流中土時至緣熟
達摩之來直指人心而已至于大鑑其道大行五宗並
立枝葉扶疎戶庭雖分惟一不二臨濟一宗大機大用
收攝無量視彼孤絕接人爲廣自是以來幾將千載弘
法宇內多其子孫其最明著者自風穴小止首山淳興
汾陽慈明楊岐白雲東山圓悟灼有端緒宋之南渡國
於江海之間而慧命克昌有隆有杲所謂千古豪傑之

士激揚宗要風動雷應聲光莫盛焉華公親承虎丘而
受妙喜衣版之付佛照振其父風演化相望而應庵以
來相繼者密庵傑破庵先無準範遂終宋之世矣皇元
混一海內崇尚象教度越前代時則有雪巖欽公擔荷
此事一時坐大道場說法東南無慮千數皆其法嗣師
子巖頭立死關者高峰妙公其長子乎能殺能活據其
正令以接後人寥寥曠絕之餘環視四顧能及之者鮮
矣是故出其門者辨才福德名行于世者不無其人至

於實證實悟正眼洞徹縱橫自在人天罔措則吾斷崖
禪師而已師俗姓楊氏父大宥母張氏以宋景定癸亥
十一月廿三日生師於湖州德清縣能食不茹葷酒六
歲始能言但從其母誦法華經於人世事懵無所知姿
貌嶷然志若有所待年十七有禪者過之誦高峯上堂
語曰欲窮千里目更上一層樓師忽言曰此大善知識
必能爲人拔釘去楔耳能與我往見之乎母驚異之略
具衣裝與之行見高峯于天目山師子巖之死關焉童

子峯謂之曰汝所持何多爲師曰以待寒暑峯曰學佛者不如是師即刻盡以散諸人乃令提萬法歸一一歸何處話因名之曰從一他日峯爲僧舉牛過窻櫺話師聞之忽生大疑叅究不倦一日告峯曰上極天宮下窮水際盡大地一琉璃瓶峯曰莫作聖解他日過鉢盂塘見松上雪墜有省即詣峯呈頌曰不分南北與西東大地山河一片雪聲未絕峯痛棒之不覺殞身崖下懸崖壁立人意其必絕同學明通捫蘿接磴以救之則已出

山半無所苦也謂通曰我往江西見欽公去也通曰汝
辜負老漢捧矣力挽之還即與通還山之西禪庵自誓
曰我七日不證則決去矣遂直堅壁忘廢寢食夜則攀
樹露立達旦未及所期豁然大悟馳至死關呼曰老和
尚今日瞞我不得也呈頌曰大地山河一片雪太陽一
照便無蹤自此不疑諸佛祖更無南北與西東明日峯
上堂云我布縵天大網打鳳羅龍不曾遇得一鰕一蟹
今日有螭螟蟲撞入三十年後向孤峯絕頂揚聲大叫

且道叫箇甚麼舉拂子云大地山河一片雪師便奪峯
拂子爲衆舉揚訶勵同學辭不少遜復曰盡大地有一
人發真歸源從一皆知之峯歎其俊快有僧叅峯次峯
令見師師曰驀直去其出言大抵如此久叅者愧之幾
有命如懸絲之慮遂歸德清其母爲賣簪珥同入武康
上柏山結茅以居人見其渾俗罔測其意越五年還山
見峯峯云大有人見你拖泥帶水師曰兩眼對兩眼遂
雍落峯改其名曰了義元貞乙未高峯示寂師亦韜晦

或游禪林頽然居下板孤峭巖峻不假借人辭色或觸其機鋒發言如奔雷諸方客衲莫不驚歎居不擇地隨寓而休而律範大閑凜如冰雪所至四衆歸重公侯貴人爭相迎奉無虛日師子正宗禪寺累請住持若不聞召未嘗受請立僧而咸尊之曰義首座云中峯本公大揚高峰之道烜赫昭著法席之盛中外罕及至治癸亥棄衆而化同門布袍雍公見地明白提唱超卓而去世更久後泰定三年師勉徇衆請歸坐祖庭者一載所謂

正宗禪寺者也。叅學之衆輻湊而至。或示衆曰。除却語默動靜道將一句來。又嘗曰。一息不來。向何處安身立命。然或嬉笑怒罵。痛言穢語。人所不堪。或不因勸請。自肆談說。或成頌偈。不待思惟。應機而發。人所莫測。元統元年歲除日。師忽謂從者曰。有一件事。天來大。你還委悉麼。良久云。明日是年朝。正月六日。詣法塔西。指空地曰。更好立箇無縫塔。其晚與禪者談笑。至夜分。乃曰。老僧明日天台去也。禪者曰。某甲隨師去。師曰。你走馬也。

趕我不及翌早跣趺而化世壽七十二僧臘四十有九
後七日藏其全身于師子巖之後雲深庵化之日雷砰
雨射白晝晦冥葬之日雪花繽紛林木縞素送葬者數
千人悲慟哀戀聲撼山谷初華公示寂會葬齋次師笑
謂衆曰後十二年更爲老僧一會至是十二年矣至順
二年七月文宗皇帝聞師道行有詔命宣政院使賫香
幣入山宣問勅有司加護元統二年八月中書平章政
事御史大夫薩迪奉今上皇帝明詔賜號佛慧圓明正

覺普度大師璽書至山師已不及見也前住持普慶禪
寺正印本蒙古人厯徑山第一座以常侍香其席與同
志以師事實來求塔銘後二年鄱陽張善式從本公游
居天目最久結輯師生緣悟由語錄平實可考乃按而
序之集昔常與師相見於吳郡忽已十七年矣周游南
北退處空山思欲載見如師之高明洞達者不可復得
慨觀古昔祖席之盛接人之的何其宏偉卓絕哉虛空
無盡佛法無盡有能得是傳者集雖老猶將往問之故

爲之銘曰

傳法正宗臨濟最弘汾陽慈明揚岐大行佛果二子雙
樹齊聳區區東南雷動海湧密付心傳惟證乃知孰爲
之祖孰爲之師巖峯之巔師子返擲我見其人斷崖千
尺莖草金身說法熾然無當吾機我非不言堂堂天目
鼓鍾朝夕龍象人天游宴食息前際既往後者未來我
於其間重關一開天子有詔於赫嚴護使未及山委席
不住山高雲深靈骨在焉摩尼滄海朗月中天

鐵牛禪師塔銘

衡州酃縣靈雲寺鐵牛禪師去世三十六年其弟子智
涇自吳越行乞歸茶陵謀建禪師之塔以天目僧惟則
所述狀來求爲之著銘集於湖海間方外之士其學有
所不能盡知而來求者隨分贊歎使天下後世有以觀
夫一時人材品節之盛也初予得鐵牛病後普說而觀
之歎其用工之實勤見地之實到漢語人也以其踐履
經行之真實無假借無掇拾無崖險以驚眩誅茆於臆

魅魍魎狐兔虎狼之窮山曾不事奔走酬應居大刹以爲崇其從之者實爲死生之事以求決擇激厲誘掖必有實得而印之非有所因藉推引以爲衣食進用之計者也予早出仕蹤跡不得至湖南吾師以告寂常恨不得相見而予亡弟前進士槃仲常父少年宦學清湘嘗一見師師告之曰此事最好著到亡弟儒者也亦於師言有所感焉是以予甚欲知師之始末而不能得也今以是相囑而則之言鑿鑿金石凡所紀載不待彙括敘

而錄之無愧辭矣師姓王氏諱特定吉安太和人故宋
戶部侍郎贊之九世孫也以嘉熙庚子八月十一日生
自幼葷血不接於喉吻清苦剛立而世緣頗奪之咸淳
庚午年三十一矣始得從肯庵勤禪師於其鄉之西峯
寺乃得剪髮如其志既而雪巖欽公禪師住宜春之仰
山師往事之服頭陀行聞巖公上堂云學者工夫七日
夜一念無間眼不交睫而無入處則老僧爲大妄語師
默有所領迅厲奮發巖請師主東淨師爲衆僧滌廁籌

是年堂中僧多病痢下師悉力供持亦染其疾居涅槃
堂醫以爲不可爲師乃內自省寃平日所得所用盡不
得力師取觸器於屏處危坐其上勺飲不入口屹然如
山經兩晝夜不動其三日一念無生前後際斷四日至
七日動靜二相不生至二更盡忽見山河大地遍界如
雪天明月乾坤色不得久之聞擊木聲通身大汗而愈
見堂中然燈草即頌之曰脫皮脫骨體白如玉未點已
前河沙遍燭自信踊躍不已振衣扣方丈通悟巖連

舉公案詰之應荅如響乃示偈曰昭昭靈靈是甚麼眨
得眼來已蹉過廁邊籌子放光明直下元來只是我則
癸酉歲之六月二十四日也居衆中六年當我國朝至
元十五年之戊寅巖於七字堂前以衣付之有偈云無
相福田衣我今付與汝悟明心地後如龍吐甘雨自是
從大僧歸堂脇不沾席者又六年一日聞上堂舉亡僧
燒了向甚處去自代云山河及大地全露法王身言下
疑情蕩盡身如踴高丈許衆退即詣方丈曰適來和尚

舉揚般若直得法堂前石獅子笑舞不已巖云試道著
師云劫外春回萬物枯山河大地一塵無法身超出如
何舉笑倒西天碧眼胡巖敲面前卓子云山河大地一
塵無者箇你師作掀倒勢巖云云一米兩竇及入室問
云親切處道將一句來師曰不道巖云爲什麼不道師
拈起手中香合子曰者箇得來不直半文錢巖云多口
漢巡堂次師以楮衾裹身而睡巖召至方丈厲聲云我
巡堂汝打睡道得即得若道不得即趕汝下山師隨口

答曰鐵牛無力懶耕田帶索和犁就雪眠大地白銀都
蓋覆德山無處下金鞭巖曰好箇鐵牛遂因以爲號二
十五年戊子歲師遊衡陽之酃縣有桃源山者頗險絕
邑人嘗寨之以避兵天兵至招之不服盡殲諸其下骸
骨狼藉自是無過之者畜聚怪毒傍近甚畏其害師至
衆請居焉師與其徒數人茆舍其間風雨昏暮狂獸異
類號呼環繞師喻以迷悟因緣且授之戒其怪遂息酃
素不知禪學邑長巴延令程公相率入山受教而豪強

者亦來盡禮瞻拜邑人尹桂芳與其族人捨地段德祥父子等創殿割田以爲先倡營構日盛爲大精藍四方禪衲踵至寺曰靈雲者因桃花而命之也鍾鼓既設大弘雪巖之道儼然一大道場矣行百丈清規亦略其繁細以爲有妨於工程也行叅坐究以身先之其將有覺者則躬候其時而發之嘗因僧病次示之曰叅涅槃堂禪正是當人捨身命處直使如虛空不挂纖豪念方有自由凡其警策激切類如此然勘辨之次棒喝正令則

不輕許可矣其得法弟子若豫章般若之世誠瑞州南山之智清天臨皇慶之克紹白鹿之師念韶陽南華之志規江陵資壽之福越臨江福林之永椿皆得法於師者巨徒梗衆各得其遺風焉度弟子凡七十餘人師之友曰陡崖惑公魯山慧公生同里同時爲僧又同得法於雪巖而惑公開法於其鄉之六字峰與桃源法席相望二百里近出巖之門者何其盛哉師於貧病凡庸誘而接之皆無所遺缺西庵之後建普濟之塔盡斂山之

遺骨而瘞之僧之終於其寺與鄰近之人歿而無歸者
皆得藏焉其用心之慈普如此壬寅之冬師將示寂作
長偈以屬學者弟子正悟結庵於茶陵曰雲居距靈雲
四十里迎師度歲明年正月十五日化去遺命火葬弟
子不忍也奉全身歸靈雲以陶器函蓋而斂之瘞諸西
庵越三年啓而視之坐如生爪髮俱長云泰定甲子移
葬於寺北三十里曰沙潭今營塔所也是行也涇與其
徒時發俱來予問之云先有鐵耶先有牛耶涇曰先師

親見仰山來予笑曰吾試與汝略模畫之因歎曰師用盡平生之力與巖翁相見但得碧眼之胡大發西天之笑堂前獅子不勝起舞之歡果何干涉乎噫微笑密傳久奉七徵者猶有待於剝竿之倒西來直指通宵立雪者曾不辭於斷臂之艱獨獠方甘於墜石馬駒何事於磨磚一花五葉之分披善巧多端之方便然一字之關五位之貴心識指要義海暗機傳者寥寥每興翹企若夫大機大用全放全收肇開河北之原近接汾陽之曲

乃有間關微服跋涉殊方化行東南威振江海華公虎丘之嫡子兼揚大慈之宗風子孫衆多班班可考遇風即止之歎吾不能不慨然於近歲焉雪巖坐禪一歲银山鐵壁以無爲門非萬金牛之力猶恐無纖毫之分以相應也及其門者或得之於咳唾之間或顯之於語言之際豎大法幢鳴大法鼓豈止一人而已哉信其七晝夜之言行其七晝夜之事師言不妄表之後來則惟吾定公也哉噫曳履長廊之松風閒話方爐之夜雪吾不

敢輕於初學亦有堅持勇進能如定公者乎吾所以歷
敘是事傳之方來蓋以爲佛法初無繫綴於人而不如
是不足以得之也雖然漸源覓靈骨於道吾洪波白浪
必有爲涇言者乃述贊以爲之銘曰

我觀古尊宿刻苦成佛道勞辱病穢惱諸不堪忍者如
墻壁木石不著亦不礙專一如虛空亦無虛空相如是
七晝夜塵勞乃真息如師之可見淨如雪中月無有山
河體宇宙可包括剎剎見法身佛說衆生說如是兩六

年履踐悉真實以我真實行所證亦真實以真實化人
得者無虛妄靈雲桃花海巖靜無變異天人非人等一
攝一切攝凜凜金剛王過去不思議右巖如楞伽莫可
至其頂偉哉顧盼雄一見更不疑拈草作梵剎帝釋之
所贊來者如密霧一一爲法故一一接法流不昧其初
心分座導諸方其法無別二不遺勸請勤畱此寧堵波
見師真實相無在無不在世間文句身贊歎不能盡

道園學古錄卷四十九

欽定四庫全書

道園學古錄卷五十

元 虞集 撰

碑

真大道教第八代崇玄廣化真人岳公之碑

國家混一海宇兼進羣藝俾各得自致其功罔或遺佚
是故禱祠禴禳之事有屬諸道家者其別數宗而真大
道者以苦節危行爲要不安求於人不苟侈於己庶幾

以徇世夸俗爲不敢者昔者金有中原豪傑奇偉之士
往往不肯嬰世故蹈亂離輒草衣木食或佯狂獨往各
立名號以自放於山澤之間當是時師友道喪聖賢之
學湮泯漸盡惟是爲道家者多能自異於流俗而又以
去惡復善之說以勸諸人一時州里田野各以其所近
而從之受其教戒者風靡水流散在郡縣皆能力耕作
治廬舍聯絡表樹以相保守久而未之變也國朝之制
凡爲其教之師者必得在禁近號其人曰真人給以印

章得行文書視官府而真大道教者則制封無憂普濟
開微洞明真君劉德仁之所立也以弟子嗣守其業治
大都南城天寶宮又嘗得郡置道官一人領其徒屬與
全真正一之流參立矣今其第九傳掌教真人張清忠
者世家關中其譜則橫渠氏之族姓也事親至孝制行
堅峻嘗掌教矣厭謁請逢迎之煩逃去之久無克充其
任者朝廷重其名實遣使尋訪給驛致之既見度不可
辭即舍所賜傳徒步入京師深居寡出人或不識其面

著書以名其學文多奇奧貴人達官來見率告病伏臥
內雖有金玉重幣之獻漠如也或拜伏戶下良久自牖
間得一語而去已爲幸甚過望至於道德忠正縉紳先
生則納屣杖策往見不以爲難時人高其風至畫爲圖
以相傳翰林學士吳公嘗移疾假館于天寶宮之別業
其徒以真人道行記請吳公之言天下學者所尊信因
必其可書者以遺之其徒爭取以模刻諸石遠近且十
餘所真人聞而喟之曰始吾學道豈求名哉遽止之不

能也則來者告曰木則有本水則有源矣吾師之隱德未傳聞於世而吾獨以吳公之文行是既爲吾弟子先矣惟先師之事今吳公歸老臨川之上念不可復以強之請子爲之辭予既思吳公知張真人事必敬重之乃授其事而爲之次第曰真大道第八代師曰岳真人諱德文字闕父曰得慶故家絳州翼縣娶澤州王氏兵間遷涿之范陽今爲涿州人生三子真人其季也將生時其母夢老人皓鬚長身冠劍壯偉告之曰當斃寄母

家矣明日州人見有青氣西北起若自天來者奔從氣所往視之則岳氏家也氣止而真人生歲乙未之九月十九日距今九十三年矣生而雄渾稍長不爲兒嬉性不嗜酒食肉亦絕不啖年十六辭親入道龍陽宮其父愿慤人也事稼穡惟謹心甚是之而長兄興方以才勇爲行軍百夫長疑其惰也驅而置之行伍之間非其志也是時五代師大玄鄺希成真人居懷來水峪之大玄宮往依焉十八受教被其冠服漸領其文書谷帛之事

又主四方之來受其戒誓者太玄甚重之而其父母且老從真人於水峪事太玄後皆泊然委蛻其徒稱之太玄之化去也密告其六代師玄通孫得福真人曰岳生其八代乎第七代師頤真李德和真人之掌教也署爲法師充教門諸路都提點以副已也至元十九年十月真人所焚香爐中有異徵方怪之而李師升堂集衆以教事付真人曰先師之囑如此遂以二十一年宣授崇玄廣化真人掌教宗師統轄諸路真大道教事又賜璽

書褒護之自是眷遇隆渥中宮至召見親賜袍馬安圖
丞相嘗病其人視之立差時甚神之諸王邸各以其章
致書爲崇教禮助者多至五十餘通而闕實都而王又
爲勅庫藏脩宮宇廣門牆充田畝始冠與衣間飾金寶
極其精盛元貞闕年加封其祖師錫賚尤厚使人立碑
棣州冠劍所藏處是年奉詔修大內延春閣下賜予徧
及其徒而真人以大德三年二月化去而升仙矣始涿
有童謠云涿有八岳父老莫之解也後真人號岳祖祖

蓋其徵云而岳氏由真人父子入道自其仲兄得元以次子孫女婦從其教數十人焉吾聞其徒云西出關隴至於蜀東望齊魯至于海濱南極江淮之表皆有奉其教戒者皆攻苦力作嚴祀香火朔望晨夕望拜禮其師之爲真人者如神明然信非有道行福德者多不足當其任而真人時常使人行江南錄奉其教者已三千餘人庵觀四百其他可槩知矣銘曰

道之大行天下爲公獨別其真孰異於同民之好逕前

哲攸病盡塞多岐以會景行我保肫肫補息泯泯弗鑿
弗列混然樸淳萬偽日滋莫之能止故憂世者去彼取
此深宮渠渠千靈來居神師教言按筆有書敬共奉承
徵信玄契導和以興涿鹿之阿樂丘崔嵬矧畏疵厲鞭
風駕霆肅其能來贊我泰定億萬千禩何以著之刻石
垂紀

陳真人道行碑

善爲老子之學者泊然而通介然而容燭乎幾而不作

於用適乎變而不阿其從至自外者漢焉不爲之動存
乎中者淵焉不見其窮冲冲乎充充乎執之則無方建
之則有宗者吾得一人焉崇玄冲道明復真人陳公先
生也公弱不好弄靜居若思昆弟三人既喪父伯氏以
儒顯仲氏能治家以爲養其母某夫人知公志使從師
龍虎山玩心希夷爲學日約人莫測其所至而其所造
亦莫自知也及來京師天下英俊咸在從而締驪者若
飲醇而飫甘豪者靡機者弛有其能者莫不慊然自失

而退若公者非古所謂德人者耶公始辭母出家雖遠去而未始頃刻忘嘗思報親之大者而盡心焉而人所見者晚歲歸爲親壽燕樂親戚鄉里累日人人感動及歿奔喪治葬哀毀如禮故開府儀同三司張公畱孫歿公以弟子諸孫護喪歸開府朝之大人舊臣喪所過傾官府走士庶弔奠無虛日公摧盡中情凡役具辦人又以爲難能然公再罹鉅創形氣向恭而爲生之道傷矣蓋還京居五年淘煉清虛一旦化去隤然委順弗撓弗

恒天厯二年四月四日也年五十二師友哭之慟大夫
士來弔者皆失聲凡爲其道者哀思之不忘無間言初
開府公受知世祖皇帝肇設玄教身爲大宗師擇可以
受其傳者非奇材異質不與也今大宗師吳公全節元
貞大德中爲天子禱祠名山見公於上清正一萬壽宮
歸以告開府遂召以來深得開府心歲從車駕行幸嘗
察罕海有旨禱雨大應故武宗皇帝仁宗皇帝興聖太
皇太后皆知公道術宣授某法師提舉崇真萬壽宮進

授提點遂封真人兼領龍興玉隆萬壽宮又領杭州宗陽宮開府之師弟子得封真人者十數人而張公吳公夏公文泳以真人居大都崇真萬壽宮典司玄教公之封真人也贊書以四傳屬之而遽止此其命也夫公好讀書而樂接世務其居在宮中最幽迥處庭中草木無所剪治花實時成云以觀化好爲詩清麗自然有足傳者手校道書丹經大洞玉訣靈寶黃籙齋科等書皆極精詣其徒受而習焉嘗道杭杭方早徧禱弗應行省丞

相達爾罕候公以爲請公坐馬致雨告足杭人至今道
之公又能論人生甲子推之以言其禍福壽夭奇中人
異之公不以爲事亦未嘗言也公歿時篋中有書數卷
耳幾無以爲歛自附身以至於還葬皆吳公出私財給
之奉喪歸其里者馮瑞京徐慎初其墓在某處葬以某
年月日提點舒某某來求銘舒張馮皆公以次相傳之
弟子徐從游者也予與公爲方外之交者三十年最知
公故宜銘公諱日新字又新闕 饒之安仁人祖諱某

父諱某銘曰

真人乘鷖忽其登天上薄太霞下蹴紫烟寶化而消名
在世間我哦其詩琅璈相宣秋高露零素華娟娟松有
茯苓石有醴泉來食來游待以歲年雨入于田雲復于
山泯泯漻漻曷窺其玄城郭孔固何日一還燕樂曾孫
有教有言我銘在茲百靈守虔

九萬彭君之碑

九萬先生彭君南起者廬陵人六歲能記誦經史其父

攜之至豫章西山又六歲入城府學於紫極宮遂爲道士稍長游湖湘既歸有文名尤長於詩臨川崇仁西北四十里有仙祠曰上方觀觀之主者陳復宗見而異之延而客之親之譽之使其長老友之其卑幼事之爲父兄時人蓋莫知其意也故翰林學士臨川吳公澄搢紳儒宗海內之彥及其門者甚衆方外士以清通博雅見知遇則未有如君之無厭無倦者也予雖寓臨川而居家之日少徒從君於文墨議論不知其他在史館時有

自江南來者言君得神仙術閉門修之三月覺有氣汨汨從中起稍引之其動如風其煖如火以次周其身如貫珠然久之有歸如明鏡止水身心泰然若與太虛爲一或嘯咏以樂或簡默以居凡俗疑其爲狂病云釋氏之宗本卑因果之說而其徒脩儀範爲世人求福田滅罪業其文甚多君見而笑之取其所爲金剛供儀者一筆數千言依其節奏而開以法要佛理粲然凡情豁焉予見之固異其有所得矣後聞其東出閩嶠過武夷至

于海際以爲古仙奇藥往往在是蓋有所訪云予既歸
田始得至所居畱久之乃敢問之曰予聞近世有成仙
者宜春玉谿李簡易先生其人也信國趙丞相之子淇
嘗面授其說予偶見其書子之游湘州聞其說乎君啞
然笑曰吾危得仙矣不欲與世俗爲異也文心之老願進
其方乃扁其室曰青城真寓以待予來而予未之能從
也邑中有富家棄妻子變居室爲道家祠宇其教之師
采其意上聞而請君主之從之居三月忽往紫極宮畱三

月與所知別遽歸上方所居之山房而委蛻焉時仍改
至元之元年十一月九日也年五十有二有詩文若干
卷道釋儀文若干卷西去山房數十步有支隴焉隱然
其隆廓然其容松柏榎楠鬱乎蒼蒼良田清水隱映左
右蓋嘗與予米蘭於斯也其弟子陳子靖龔致虛請予
觀之師尊康克明袁用宏以所遺冠劍藏之其友戴衍
其從子從之學道者大年請予書其遺事而識之君族
本出唐吉州刺史玠君在時嘗求予識其父墓頗詳上

方爲郡邑之望車馬至者不絕自得君也聲聞日重部
使者張策以大儒卓行自居歷所部捄荒過之畱君舍
論民事疾苦與政令所宜汎論經史古今治亂天文地
理之說至于儒行道要語至達旦不能相舍去嘆曰道
家乃有斯人哉至京師爲予誦之則吾九萬君也陳復
宗將老出黃金散諸弟子皆有所囑亦有以與君而笑
曰惟子所爲復宗歿數年君集衆而告之曰師鄉所與
金有客化易致息倍蓰具在此其爲觀中買田以食衆

吾無用也然後人服復宗之知人云戴衍曰公幸爲詩以招之去之千年必能爲其人一來也乃爲之賦詩詩曰天之蒼蒼其有涯耶九萬其程孰羽儀耶大羅之鹿旂峯旆旆膏田丹井靈氣所會有芝有蘭爲秋爲春子去不來白雲誰隣噫後之人善視松柏我作新詩永鎮玄宅

倪文光墓碑

至順二年夏予扈從上都吳郡倪瑛與其弟珽使人持

張先生貞居之書來求製兄文光真人碑銘前十年予
從表兄臨邛魏君起客吳中爲予言文光之善旦日部
使者過其門而見之表其堂曰高風托予記之予爲之
言曰嗟夫士或困於窮愁放逐力有所不得爲則自托
諸仙人道士以爲解苟有可爲焉知其將無不爲乎唯
德慧術智可以有爲而有所不爲脫然遺世獨立庶幾
其爲高風者乎若文光之所就部使者廉問所至表之
敬之爲宜云後予直翰林聞朝廷賜文光以真人之號

歎曰名者實之賓文光之高風既達矣乎不知其未及受命而歿也貞居脩大洞秘訣句曲山中與予有栖遁之約者也今實以書來請而瑛珽又知好文學予敢愛於言乎按鞏昌王仁輔狀文光姓倪氏系出漢御史大夫寬宋景祐中有諱願者自西夏入使宋不還徙都梁子孫漸多聚族以居其里遂名倪湖建炎初其曾孫益渡江至常州無錫居梅里之祇陀遂爲無錫人益生仍及生淞淞生將仕郎椿椿生炳世積陰德族大以厚實

生昭奎是爲文光真人也母邵氏始娠文光夢異僧持
械至其家及生有光夜赫然出屋上鄉人以爲火也操具
昇水四轆至則知非火也其家固已異之稍長入鄉校
校師常絀其問辨爲歌詩興趣自然有出世之意善相
者過之告其父兄曰是兒不策勲萬里亦且標名九霄
矣文光頗以此言自信經史之外凡瞿聃之書至於興
地象胥之說莫不精究及冠雅志屏華絕欲獨念無他
兄弟備養不忍舍其親而去耳元貞初東平徐公琰按

察浙西招文光議幕中甚奇之薦諸行省授學道書院
山長吳人祠子游處也因爲立學官焉文光訓授有法
又出私錢更作禮殿及祭器士子畏愛之秩滿用薦者
當遷官文光慨然以爲不足則有務於外吾安所不足
使吾心茫然無所主以身從桎梏乎謝去薰俗以黃老
爲歸久之二弟生且長文光曰可矣去從金先生應新
爲立學又從餘杭王真人壽衍游即弓河之上作立文
館祠老子而事之以二尹子亢桑子莊子列子規制弘

敝玄教太宗師張上卿偉之召而薦諸朝以親老弗欲
出上卿亦不之強也署文光爲州道判又進道正以領
祀事州人屢以水旱請禱之靜嘿內處而肸蠁外應人
莫窺其際蝗出境中文光爲鄉錫山祝之雲族而雨蝗
悉入具區歲大熟長吏列上其行業至大元年有旨以
玄元館爲觀賜號元素神應崇道法師爲住持提點二
年宣授常州路道錄延祐元年有旨陞玄元觀爲玄元
萬壽宮仍住持提點杭州路開元宮事明年特賜真人

號是爲玄中文節貞白真人命及門而文光已遷化則
天歷元年九月十四日也文光既服道士服然執親之
喪亦遵程子朱子所脩禮用古葬法亦不徇流俗爲祠
以奉祀又爲永思堂於錫山以瞻望其祖父之始來居
者母夫人且老文光築室先廬之近歲時歸養親煥寒
飲食之宜得親之驩心焉二弟尤淳族人里中子弟不
暇教者爲義塾教之歿不能葬者葬之貧無歸者資遣
之大夫士相見見其儀觀軒特襟靈虛曠未嘗不嘆焉

晚自號玄中子或稱初陽真逸別有清微館於錫山之
陰蓋將神游寥廓又爲樓居曰棲神偉觀又臨黃公澗
左作小蓬萊之亭右爲天淵之亭自擬於陶隱居之聽
松風也又卜霞步峰下爲栖神之地築室種樹高風堂
在焉句曲自茅氏兄弟歷陶隱居司馬承禎世有傳授
今劉君大彬奉其大洞經法爲之宗師文光晚乃從之
遊每一造之彌旬乃返神契冥感句曲人愛慕之而文
光有遠舉之志矣前解化數日召二弟屬以善守先業

事母夫人召弟子單宗玄屬以傳法度之事以九月九日會親友于清微館登惠山絕頂下睨五湖揮手謝別後五日宴坐玄元方丈道室翛然蟬蛻顏貌如生春秋五十雖其令聞美譽表於鄉里達於四方淡泊絕欲以終其身非所謂卓行者耶國家崇尚玄教其位號自法師爲真人始自禁廷錄旨識以寶璽而賜之其重自中書書制而命之所謂宣也其位望重矣至若真人者多在朝廷任祝釐之事不然亦當以釐事入奏則命之文

光高居雲海之上林泉之間跬步不踰於戶庭而君命狎至遂躋清顯非名實素孚者疇克爾耶昔玄靜先生之終也柳識之文不加多顏清臣之文不加少後世並稱焉故酌其宜而爲文光之詩詩曰

錫山之原其土阜溫麓有嘉泉泓渟弗奔敷潤千里升爲雨雲濯濯秋明煦煦晨暎卉木清妍庶生並繁含景抽英出爲真人抱道以居孝友俱存真館邃嚴金碧珠璣雲霞蔽虧日月吐吞消搖庭戶高風遠聞天書玉章

來於九門霞衣金純珮切瑤琨受命于家三接彌尊淵
潤巖輝襲體暎暎稼穡有秋桃李何言句曲之虛有祕
洞文攝衣來登受道神君飛步太霞下卻塵紛審于九
淵歸息天根鬱鬱丘園遺劍在焉寥廓歲年永懷孤騫
墓誌銘

玄門掌教孫真人墓誌銘

真人道行著于天下其最可傳信者延祐二年夏禮部
尚書元明善代丞相禱雨長春宮真人曰明日雨徵至

須丞相上章自言憂民報國之意小得雨尚書卽爲章
往白丞相丞相病在臥內使人取章入署名付還真人
一見告尚書曰章觸婦人手且得罪寧敢望雨乎使人
問丞相門下果然二人恐懼拜伏請罪久之退齋宮俟
命夜半真人曰上帝念民無辜賜之雨三日果雨三日
尚書儒者盛貴人不覺屈膝拜之後建法主殿于宮西
朝廷命國工塑像而元公爲之碑五年夏中書參知政
事王公桂禱雨亦如之興聖宮遣重臣醮雨長春七日

正醮雨大至所遣重臣真人曰勿憂也比祭酒雨止月
星粲然皆以聞後上見真人目迎送之曰真仙人也命
圖其像屬翰林學士承旨趙公孟頫爲贊以璽識之陝
西行御史臺都事吳君昉僉陝西廉訪司事張君翥在
鳳鳴見真人爲李氏修醮五色雲覆其壇二日迺已皆
記以文渭溢岸壞漂廬舍民走告真人真人爲至水次
登壞岸衆危之然水立止此皆有文書可考歌詠以百
數若此者不可盡書也蓋真人端靜貞一自然感化如

此非有神怪譎幻者也故君子信而傳之真人諱德或
字用章眉山書樓孫武諸孫年六歲造終南祖庭穆真
人坐下十一歲爲道士事天樂李真人與同輩執事未
嘗忘讀書紫陽楊公真然見而異之猶子誠明張真人
淳和王真人洞明祁真人闕張真人掌教時皆親禮
用之世祖皇帝時命真人從親王匡西服成宗皇帝命
真人分教秦蜀間武宗皇帝賜真人號仁宗皇帝累加
恩命召至京師掌道教號曰特授神仙演道大宗師玄

門掌教輔道體仁文粹開玄真人管領諸路道教所知
集賢院道教事推恩封其師若祖于洞真爲真君高圓
明李天樂爲真人穆王二師爲真人終南山重陽宮者
全真之祖庭也至真人居之始大修飾天子爲出尚服
賜之鎮其宮甘河祖師遇仙處也真人奉詔建橋以寓
度濟來者之意其役甚大又詔元公明善製碑文七年
得請于上歸終南優禮送之至治元年秋夢賦遊仙詞
飄飄有遺世之意八月五日化去壽七十九有希聲集

行于世九月十二日瘞之仙遊園明年其弟子任道明
張若訥顏若恨趙道直景若冲等來請銘銘曰

眉山之陽詩書故家篤生異人爲國光華於粲有文獨
以道著號曰真人天子所予真人燕居雲間日舒物不
疵癘容容于于真人出游靈風前除塵埃廓清百神爲
驅天子有祈真人致之曰雨曰暘天亦不違盛德之尊
豈惟玄門紛紛鄙涼亦皆寬敦終南峨峨仙游有石我
銘識之過者必式

黃中黃墓誌銘

黃君元吉字希文豫章豐城名族父某母吳年十二入
玉隆萬壽宮事清逸堂朱尊師朱歿其師王月航尊師
而教之王尊師嚴潔清儉有古人之意善醫藥施謝之
積粗贍即閉門絕來求醫者希文請授其術以爲業王
尊師不可曰吾非有靳於子也顧醫道甚精微識慮稍
不至則人由我而死非易事也將以此爲利益不宜若
幸得舍此不爲冀寡過耳誠慮返累子不如歸求清淨

以自致也王尊師歿久之四山中有劉玉真者本質行
老儒隱居深僻有神明之遇曰晉旌陽許公千年龍沙
之記今及其時而劉則八百仙人之首云獨重希文以
爲可託及去世以其傳囑焉蓋其說以本心淨明爲要
而制行必以忠孝爲貫而已希文事劉先生如父事其
夫人如母苟遠去飲食必祝之而後嘗奉其言如臨天
地鬼神乃即其山作玉真隱真洞真三壇以授弟子至
治三年又以其說遊京師公卿大夫士多禮問之莫不

數異明年泰定改元嗣漢三十九代張天師朝京師廷臣薦希文者曰中黃公剛介堅執長於幹裁向嘗都監其宮治衆嚴甚人或不樂而土田之入廬舍之完公而成功昔爲忤者更交譽之親之其後從玉真翁得旌陽忠孝之教益折節就沖淡爲達人鉅公前席宜表異之乃爲書請希文爲案法師玉隆萬壽宮焚脩提點未行玄教大宗師留之崇真宮期年將以其名上聞奏且上有璽書之賜而希文翛然高居惟以發明師說爲已事

古所謂清虛日來滓穢淨盡者蓋庶幾焉十二月十一日爲書寄別其弟子陳某等而命其從者曰今夜子時當報我及期從者以告希文曰吾返玉真之墟矣明日用人淨吾骨於城東門外薪盡火絕有風南來者吾報汝也已而果然從者負其遺劍歸藏西山希文在世五十五年爲道士四十年度弟子若干人授淨明忠孝之教者人衆不可備列趙中山嘗與希文俱來爲之言曰子爲銘其藏予重趙君之請故爲銘曰

西山之墟古仙宅奇蹤一隱兩五百陽品發輝表靈赫
我興受書繼玄德長生不死爲世則忽焉法之不可測
鏘金爲音玉爲畫表歸其土填無極

張宗師墓誌銘

至治元年十二月壬子開府儀同三司上卿輔成贊化
保運玄教大宗師知集賢院事領諸路道教事張公卒
于京師年七十有四明年三月辛未歸其喪于廣信之
貴溪將以泰定三年十二月十四日甲申葬于南山之

月嶠其弟子吳全節以事狀致書虞集曰維玄教本始
于我太宗師今忝承嗣之重誠不敢怠維太宗師有道
行願刻石玄宮以著無極謹按公諱留孫字師漢姓張
氏其居貴溪自高祖戡始上遡唐宰相文瓘十七世公
生有奇質長七尺餘清峻端重廣顙美鬚髯音吐如洪
鐘周游四方見者異之相師曰此神仙宰相也從伯氏
聞詩學道上清宮江南內附與三十六代天師宗演入
朝世祖皇帝見而異之召與語稱旨留侍左右給廩餼

供帳從行幸上祠帷殿裕宗皇帝以皇太子侍風雨暴至衆駭懼詔公禱之立止上幸日月山昭睿順聖皇后病甚詔公禱之即有奇徵病良愈自宮禁邸第大臣之家皆事之如神明上命公稱天師公言天師嗣漢張陵有世系非臣所當爲乃號公上卿命尚方鑄寶劔刻文曰大元皇帝賜張上卿兩都皆作崇真宮賜園田命公居之號玄教宗師佩銀印用公奏以天師宗演爲真人掌教江南分集賢翰林爲兩院以道教隸集賢郡置道

官用五品印宮觀各置主掌爲其道者復之無所與上用言者焚道家經裕皇以公言入告上爲集廷臣議存其不當焚者而醮祈禁祝亦不廢岳瀆既皆在天子封內即使近臣從公徧祠名山大川訪問遺逸勅百官餞之國南門北還所薦論上皆以名召用有司議開河京城以便漕者未決上召問公乃可其奏大臣聞公論傷財害民之故乃至躬負畚鍤以爲民先河成至于今使之公非洗沐不得遠去帷帳每出輒勅衛士載腰輿歸

公是時天下大定上思與民休息公日論黃老治身清
淨在宥天下之說深契旨意上將命相召公以周易筮
用旺扎勒得同人之豫公曰同人柔得位而應乎乾君臣
之合也豫利建侯命相之事也願陛下勿疑旺扎勒既相
遂受遺輔立身係天下之托者十有餘年誠由世祖之
聖宗社之福然與聞贊決之密事亦重矣是以世祖末
命以公舊德屬隆福宮而隆福太后又以上意諭公善
事嗣君也成宗皇帝身履太平之盛致意天人之祭以

持保其盈成謂道家醮設事上帝甚謹既尊信公則命爲之如其方終成宗之世幾歲脩之內在仁智殿延春閣外則崇真長春兩宮上常親祠其上章皆親署御名每盡七日乃罷致白鶴翔集之應史臣頌之然而星孛水旱地震之禱公猶以脩德省政之事懇懇爲上言之則非徒禱矣於是詔天下復用其經籙章醮加號玄教大宗師同知集賢院道教事又加特賜上卿武宗皇帝即位公每入見上望見即亟召賜坐陞大真人知集賢

院事位大學士上尋加特進時太皇太后在興聖宮仁宗皇帝在東宮並待以優禮武宗仁宗之生也公皆受命世祖爲製名興聖宮記其事是以贊書及之進講老子東宮推明謙讓之道及仁宗在御猶恒誦其言上嘗坐嘉禧殿顧謂大臣近侍曰累朝舊德今爲誰乎未及對上曰無踰張上卿矣進開府儀同三司加號輔成贊化保運玄教大宗師刻玉爲印曰玄教大宗師印上手授公曰以此傳玄教之宗公年七十上使國工畫公像

詔翰林學士承旨趙公孟頫書贊進入上親臨視識以
皇帝之寶以賜公生日是日賜宴崇真宮內外有司各
以其職供具宰相百官咸與焉興聖宮中宮皆有加賜
明日公入謝因奏曰臣以山林疏遠遭遇列聖恩寵顯
榮於臣極矣深懼滿盈乞骸骨歸不允今皇帝禮遇一
如先朝重賜璽書護之公年彌高感上知遇未敢求去
竟卒京師卒之日召弟子入室戒囑百十言端坐而逝
三日始斂顏色如生手足溫軟輕若委衣事聞上震悼

遣使賻贈以禮興聖宮中宮使者繼至傾朝虛市來會
哭莫不悲慟及出國門送者填擁接于郊畛亭午霏霧
翳日冷風肅然林木野草人馬鬚髯車蓋衣帽敕敕成
冰花縞素如一自京師至其鄉水陸數千里所過郡縣
迎送設奠不約而集比葬四方弔問之使交至自王公
以下治喪致客未有若此盛者於戲世祖皇帝既一海
內盡得其豪傑而用之至元中羣策盡屈用集大成謀
略商計武勇工藝之臣與公並立於朝者其遺言成績

之存或遠矣而公歸然乃獨至今於是神孫聖子繼繼承承者五世矣四十七年之間大臣拜罷親近用事者更迭出入其善者固已至其子若孫若曾孫彼紛紛起滅於忽焉之頃者又何可深計天師神明之家也公爲奏其子孫之傳亦既四易況其他哉而公以一身對之無一日之渝改其於斯世何如也蓋嘗見公以高年其尊貴每入朝大官貴人或迎拜如事其大父而公之接士雖極困約者不爲敖惰 闕

霆

往來承陟降碩庭列聖在天鑒于孫子公在左右申
錫純祉大江南東阜隆液融升神返全有識其封皇錫
篆玉宗傳之守尚俾來嗣與國長久

非非子幽室志

漢代所謂道家之言蓋以黃老爲宗清靜無爲爲本其
流弊以長生不死爲要謂之金丹金表不壞丹言純陽
也其後變爲禁祝禱祈章醮符籙之類抑末之甚矣昔
者汴宋之將亡而道士家之說詭幻益甚乃有豪傑之
士佯狂玩世志之所存則求返其真而已謂之全真士
有識變亂之機者往往從之門戶頗寬弘雜出乎其間
者亦不可勝紀而澗飲谷食耐辛苦寒暑堅忍人之所
不能堪力行人之所不能守以自致於道頗有所述於

世者不無也爲其學者常推一人爲之主自朝廷命之
勢位甚尊重而邇其立教之初意同不同未可知也予
在北方數聞有爲其道者而不可得見如書樓大方兩
孫公之掌教略嘗與之游其山居者有汝州趙先生嘗
奉詔至京師而得見之服羊皮大布之衣曾不掩脛而
肌膚潔白玉溫而雪明食飲甚寡而其氣充然如春與
人語辭簡而意遠貴富盛氣多智術者見之莫不泊然
自失予是以知爲其道者常或有人也歸田江上聞有

蓬頭金先生者甚高潔接其徒極嚴峻間嘗相聞往來
武夷聖井諸山而不獲相見則予質質塵土歲云暮矣
能無慨然於中乎昔人云千里空谷聞足音而喜亦人
之情也崇仁仙游山在邑東郭門外晉王郭二仙人求
其師浮丘伯之所歷也有余岫雲師者居之終日與人
相接而不失其介其中毅然不可犯而未嘗與人有競
意日使童子挈一簞入市人家見焉岫雲僮也輒與飯
一小器日向中簞稍滿即還師弟子主僕烹水瀹而食

之而江東西高雅之流或道過或徑詣無不即岫雲之室者分簞食共食無愧容無德色山下薄有田數畝隣人多助之耕獲給不給亦不經意故常往來予舍久而不厭問其生則道華蓋山南谷人也年十五辭親入道於宜黃縣南華山昭福觀既而歎曰託兄弟以養親從師以入道果爲何事耶辭其師以去徧歷江漢淮海渡河循山東游乎齊魯至於燕趙之間兩游華陰入終南登太白而後還乎武當衡岳羅浮出武夷過天台計其

所見必有異於人者矣在溫州寓同學者之舍州郡命
方士禱旱不應或曰此君不凡當可得雨羣起之岫雲
曰欲雨乎是日雨沾足亦不見其有所爲也郡中先有
教人學道者出妻子破家產乃可岫雲曰非道也復爾
家室治爾田疇行人道之常而不累於心可也及歸臨
川祥符觀道士黃執中聞其風而悅焉率玉清觀之
人處之仙游山破屋數椽耳居亡何信嚮四至仙殿門
無陶甓竹石不約而輯有山木閣者憑虛丈尺耳士大

夫仙人過客就是以信宿而去或至兼旬月亦不知其
耕粟之無儲也岫雲未嘗讀書而所言平易雅正故翰
林學士吳公之夫人余氏岫雲之從姑也仙游修葺略
成吳公爲之記公嘗問爾之爲學何如以顏子喟然章
對始則恍惚難象而卒見卓然自立時至而自化爾公
曰佔畢終日未有如是舉者蓋深許之矣有爲作鐘樓
者岫雲來告曰樓成丐一言予游宜春之仰山以十一
月至家而岫雲前一月化去矣至元五年己卯歲之十

月二十七日也得年六十未歿時徧與所識書別略無
恒意其弟子彭致中瘞諸山下予至其墓前致中以志
幽焉請始悟鐘記蓋自爲也乃使求石羅山之陽而刻
斯文焉岫雲諱希聖一字非非子有偈頌普說等致中
山下人年少淳謹今係藉玉清亦嘗游方江南道教之
師署爲仙游山昭清觀住持提舉云銘曰

六十而化藏斯丘孰云非仙乃其游微風落月山木秋
簞食屢空吁不畱



道園學古錄卷五十